

Equipa romontscha patriots
da Marco Cavegn

» GIUG ENCUNTER ILS POLITICHERS «

Tgei politichers eis ei da segar? Giogan quels dallas partidas dretgas era silla vart dretga, quels da miez amiez e quels da seniester seniester? – Damondas decisivas avon il giug encunter il CB Cussegl naziunal.

Münsingen BE, ils 24-09-2019. Suenter esser stai dus onns silla gliesta da spetga eis ei finalmein aschi lunsch. L'equipa romontscha astga giugar encunter ils politichers. Empau suenter las 17:15 arrivan ils giugadurs e las giugaduras dall'equipa romontscha plaun e plat sigl implont da sport Sandreutenen. Immediatamein vegn il revier marcaus, la bandiera cul tarden vegn tratga sill'asta che sesanfla avon las garderobas. Il plaz ves'ora bein, sco igl ei da spitgar per in'equipa che gioga ell'emprema ligia promoziun e nua che Christoph Sypcher, Roman Bürki etc. han empriu da dar balla. Las garderobas digl FC Münsingen fan den-

ton plitost endamen las veglias a Crap Gries. Tgisa sch'els han giu il medem architect e lez ha semplamein vendiu ils plans dallas garderobas veglias da Schluein ad in da Münsingen? Tgisa sch'els 600 commembers digl FCM han dus mauns seniasters ed ei buc el cass d'ereger sez in bi stadion? Ni ei il president dil club, Andreas Zwahlen, forsa megliers en tschintschar che far guottas cun tgau? Damondas ch'ins sa tschentar – emporta denton ca bia. Pil CB Cussegl naziunal giogan deputai sco Hannes Germann (capitani, PPS, SH), Thomas Minder (senza partida, SH), Damian Müller (PLD, LU), Beat Jans (PS, BS), Werner Luginbühl (PBD, BE), Christian "Chrigu" "Hitsch" Wasserfallen (PLD, BE) ni Jürg Grossen (PVL, BE). Auters politichers han u giu tema dil tarden romontsch ni ein fatschentai cun rimnar vuschs per las elecziuns. Aschia sto l'equipa che vegn trenada dalla legenda da "Nationalliga A" Roger Hegi vegnir emplenida cun gidonters e marionettas da politichers, sco Luigi, il motor enamiez dil CBCN. Persuenter ha l'equipa romontscha era in politicher en lur retschas. Martin Candinas, igl anteriur goli isa per la tizarza ga en 10 onns ses calzers da balla e vegn a giugar ell'attacca oz.

Allas 19:05, 10 minutas memia baul, entscheiva il giug. Spert semuossa tgei politichers ch'ei in pli ravgai sil plaz da balla. Da numar en special ein cheu Thomas Minder, leader aggressiv e Jürg Grossen, tugn. Gia ella 7avla croda igl 1:0 per l'equipa romontscha. Flurin Bundi era vegnius lantschus ella gassa ed ha stuschau la balla sper il goli vi, sco sch'el havess giu en calzers da balla l'entira stad si d'alp. Su-

enter quei gol surpren il CBCN empau il domini dil giug e vegn d'equalisar il resultat ella 14avla minuta. Damian Müller ha spedi la balla cun peiver ella reit. Beinenqual combinaziun gartegia silsuenter als Romontschs. Specialmein Anja Furger e David Flepp muossan ch'els han in bien sentiment el pei. Tuttina crodan negins gols entochen pausa. La pli gronda caschun da marcar munchenta Pascal Gamboni, suenter haver profitau d'in sbagl ella defensiu digl adversari.

Suenter pausa dat ei entginas midadas ell'equipa romontscha. Aschia vegn era Lisa Dermont sil plaz. Lezza ha negina tema digl adversari e vegn da terrar pliras gadas ses cuntergiugadurs. Schiglioc vegn il giug plitost pli lungurus ch'ella emprema mesadad. Ils politichers lain circular ruasseivlamein la balla en lur retschas, ils Romontschs speculeschan plitost sin sbagls. Grondas caschuns da marcar dat ei buc pli. Aschia stat ei tiegl 1:1 – in resultat giustificau.

Suenter il giug, agl apero cun pier, vin, andutgels e ligiongias neras ed alla tscheina cun specialitads dalla Bregaglia, cuschinada da Jon Bischoff e siu camerat, dat ei la caschun d'emprender d'enconuscher personalmein entgens diis politichers. Cun musica da Pascal Gamboni finescha quella sera. Ils politichers che paran da seser sco sin spinas pervia dil cumbat electoral fan buc liungas. Ils Romontschs gaudan aunc in ni l'auter pier, vin e vinars avon che turnar a casa.



1 Cuora pli spert che si'umbriva: Cussegliaer naziunal Martin Candinas en acciun per l'equipa romontscha.

2 L'equipa romontscha:

Retscha davos d. s. a d.: Pascal Gamboni, Andri Bundi, Giuanna Caviezel, Anja Furger, Clau Dermont, Curdin Bundi, Maurus Bundi, Marco Cavegn, Martin Candinas, Barbla Etter
Retscha davon d. s. a d.: Silvana Menzli, Lisa Dermont, David Flepp, Gion Capeder, Maurus Candrian, Flurin Bundi, Flavio Bundi